

weit nicht absehen/vnnd daß auch solche Sterne dieser größe oder Klarheit seyn/das man dieselbigen des Nachts am Firmament neben dem Monde/wenn er kurz vor oder hernacher dem vollen Schein ist / sehen könne / desgleichen muß dir auch der Arcus Aequinoctialis gedachter Sternen/mit welchem sie in dem Mittagecircel kommen/bekant seyn/welche Ascensio recta genant wirdt/ zu diesem mustu auch derselben Sterne Abweichung vom Aequatore wissen/das sind die Parallelcircel / so durch solche Sterne gehen / oder darinnen durch das Primum Mobile alle 24. Stunden werden herum gefürt. Zum Vierdten/daß du auch wissest / wie viel gradus vnd Minuten im Aequatore in der Zeit / den der Mond auff solchen Tag in seinem eigen Circel fortgehet/in deiner fürgenommenen Statt/da du bist außgezogen/Mittagscircel sindt fürüber gangen/Endtlich/daß du auch wissest auff alle Tage/mit welchem Gradt oder Minut im Aequinoctial Circul des Monden Arcus deiner fürgenommenen Statt Mittagscircel einnehmen oder besizen wirdt/welchs du als ein fleißiger Studiosus Astronomiæ aus den Ephemeridibus oder Tabulis Directionum wol erfahren kanst. Zum lezten/mustu auch haben ein gut vnnd just klein Uhrwerck/so du alle Tage nach der Sonnenlauff fleißig stellen/vnnd richten solt/wann du nun dieses allen gnugsamen Bericht gefasset hast / so merck nachfolgendes Exempel. Als nemlich/ ich bin willens von meiner fürgenommenen Statt Münden meinem Patria zuverreisen/vn mich auff Landt vn Wasser zubegeben/frembde Lender vnd Gegene zuerfahren/ vnd zubesichtigen / begeben mich derwegen zu Blexen vnter Bremen/an der Wesser gelegen / zu Schiffe/ vnd da ich nuhin ein zeitlang auff der See oder Meer gefahren/ hetten wir Erdreich gesehen/vnnd weren den 31. Octobris des 1584. Jahrs daselbst zu einer Inseln gekommen / allda vnser Schiff angelendet / vnd dasselbig mit denen Sachen/daran wir ein zeitlang Mangel gehabt/wider versorget vn versehen/da wir nun etliche Tage vnser Station allda gehalten / vnd nicht wüsten / wie weit wir doch von vnserm Patria, oder wohin wir kommen weren/vnd gleichwohl gern wissen wolten / wie weit doch solche Insel von meiner Statt Münden Mittags Circul / so in der nachfolgenden Figur mit dem Buchstaben A. verzeichnet/gelegen were/so suche ich erstlich auff den 7. Tag Novembris derselben Inseln Mittags Linien auff das aller fleißigste / wie im 39. Capittel geleret worden/vnd finde in der observation den Septentrionalischen Polum 23<sup>1</sup>/<sub>2</sub> Grad hoch in derselbigen Inseln / vnd habe dieselbe Nacht den 7. Novembris, wenn es helle were/fleißig in acht/wenn der Mond in den Meridional Circel kommen wil/vnd wenn das geschicht/nim ich als bald mein klein Uhrwerck herfür/vnnd notiere / was mein Uhrwerck/welchs zuvor nach der Sonnen Lauff auff's fleißigste gestellet oder gerichtet ist/in dem für ein Stundt vnd Minuten anzeigt / vnd finde / daß es ist 4. Minuten nach 12. Uhren des Nachts/nach diesem hab ich auch fleißig in acht/wenn der Stern Dexter humerus Orionis in den Mittagscircul komit/vnnd wenn das auch gewisse geschicht/ so schreib ich im Augenblick die Stunde vnd

Ascensio recta.  
Declinatio ab  
Aequatore.

4

5.

Vltimo.

Exemplum.  
Demonstratio.

Patria mea,  
Statt Münden.

Nota.  
Uhrwerck.

h ij

Minut